

道古堂文集

道古堂文集卷四十三

仁和 杭世駿 大宗撰

墓誌銘四

封承德郎江南淮南儀所監掣通判查君墓誌銘
君姓查氏諱日乾字天行高祖考秀自江西臨川北遷
順天之宛平曾祖考忠中前明萬歷己酉科副榜祖考
國英國子監生考如鑑江都縣縣丞以勤死官君生三
歲而孤母夫人劉以育以教姊葦山陰馬章玉知儀徵
縣事迎之往除夕陳諸褻服恣親串所欲取君年甫十
二獨端坐不爲動既長奉母來天津時倉場總督洪公

尼喀順天府尹劉公元慧皆先人生死交數請相見久
始報謁卒不一通竿牘有爲讎所誣陷京兆獄獄急闔
室聚泣不知所爲君聞之立白府尹直其事德君甚奉
三千金爲壽君笑曰某故貧肯爲京兆鬻獄哉卒却之
後用鹽筴家漸起長蘆逋賦累萬艱於稽核朝使來
熟君名坐之堂上諏詢條目君口陳手畫洞中窾會匝
月悉定又以商力彫剋陳議爲善後計使者用其言上
請利貽至今天津爲禹貢九河下游白衛二河水遇淫
雨輒建瓴而下孤城縣水中廣野無廬井君倡首設賑
屢拯民于墊阨全活無算制府彭城公上其事天聽

匪遠寵賁旋及環城隄岸如渠黃口老君堂教場單街
等地衝決不時夙稱險要君謂宜先事修築從史鯨使
疏入得報君親督畚鍤增高蘊厚卒用安堵長蘆奏銷
屆時官商屢以稽緩呈吏議君措施有方藉以全者不
形德於屑吻城西旅舍數十區每歲逼除客之不能舉
火者君陰爲償之歷久無怠色晚乃敕家事放意山水
抱德煬和用臻大耋而末疾不嬰死期豫刻斯亦奇矣
君長身鶴立音旨洪朗料事若神應變不測攬環贈珮
之好幾徧天下而生死不相負山陰王揆長洲談汝龍
會稽陶良玉先後客死京師皆親視含斂以輜車數千

里歸其喪山陰胡捷俞啟文歿無以爲斂皆始終理其
後事太原郭氏貲累鉅萬託藐孤于君君翼而長之弭
其內難家賴以不毀母夫人大革時緣事繫都門不能
盡大事痛毀幾絕得歸營葬築室墓旁三年不忍去墓
園所自號也讀書不爲章句於史事尤精撰史腴若干
卷嘗曰學不爲世用縱文采彪炳猶瑤璣之不可以川
玉弦之不可以矢也雍正九年以子爲義貴 封承德
郎江南太平府通判十三年 覃封如故改江南淮南
儀所監掣通判配山陰馬氏子男三長爲仁次爲義次
學禮女一適山陰李元皆側室徐州王氏出孫男六人

孫女九人君以乾隆六年五月十二日卒年七十有五
訃既告知與不知皆太息其行義戚屬號咷失所宗仲
余與君諸子交特深重以婚姻之好孤子等將以乾隆
七年二月十二日葬君於三河縣百草溝之新塋哀前
事來乞銘銘曰

讀一篋書將以爲世須孰守而窒孰施而迂推之行
之
管此寸樞望德而趨有諾勿違迹其咐嘔豈爲鄉閭往
不可諛來者庸可誣徵我惇史盡而不汙

朝議大夫候補主事加二級馬君墓誌銘

君諱曰琯字秋玉別字嶠谷姓馬氏系出漢新息侯援
迨宋末造丞相廷鸞隸籍鄱陽生五子季爲端益始遷
婺再傳爲眞三始籍祁門世遂爲祁門人曾祖大級前
明諸生祖承運州倅始家于揚考謙州司馬兩世皆以
君貴贈朝議大夫妣洪氏生妣陳氏皆封恭人洪恭人
生二子長曰康早歿次曰楚以後世父陳恭人生君及
季弟曰璐君至性過人事贈公暨兩恭人以純孝稱及
長德器端凝不苟訾笑授經後據案堅坐矻然如老儒
說經嶽嶽不可撼難兄穉弟考校文藝評隲史傳旁逮

金石文字自相師友後雖授室風雪淒其未嘗不抵足
聯牀恒曰吾三人如一體不能暫分也年二十三歸試
祁門充學官弟子贈公棄養仲兄又以哭母哀毀而卒
君楮挂艱鉅而前業克光以濟人利物爲本懷以設誠
致行爲實務爲粥以食江都之餓人出粟以振鎮江之
昏墊開揚城之溝渠而重脆不病築漁亭之孔道而擔
負稱便葺祠宇以收族建書院以育才設義渡以通往
來造救生船以拯覆溺冬綿夏帳殯死醫羸仁義所施
各當其阨若夫傾接文儒善交久敬意所未達輒逆探
以適其欲錢唐范鎮長洲樓錡年長未婚擇配以完家

室錢唐厲徵君六十無子割宅以蓄華妍勾甬全吉士
被染惡疾懸多金以勵醫師天門唐太史客死維揚厚
賻以歸其喪勾吳陸某病旣亟買舟疾趨以就君曰是
能殯我石交零謝歲時周卹其孥者指不勝屈也詩骨
清峻閉戶湛思輒壓儕偶合四方名碩結社韓江人比
之漢上題襟玉山雅集性耽山水京口三山中吳洞庭
林屋之勝足跡幾徧著詩十卷今世所行沙河逸老集
是也 翠華南幸迎 駕江壖

天子親問姓名兩 賜御書克食寵遇優渥是冬入祝
聖母萬壽於慈寧宮荷豐貂宮紵之賜君感激奮勉凡

遇公家之事不避艱險往來金陵攝山中賜歸及旬竟以不起春秋六十有八時乾隆乙亥六月二十一日也
誥封朝議大夫候補主事加二級 欽授道銜 恩
加頂帶一級配歙邑汪氏 誥封恭人後六年卒無子
以弟曰璐子振伯爲後乾隆某年月日曰璐卜地於廣
陵某山之陽合葬於陳恭人兆次來乞銘銘曰

山鬱鬱兮水沄沄有弟蓬蒿葬厥昆松謾謾今日杲杲
有子振衽收厥考涕唾貨賄不足言義問出地如雷奔
篋無遺金哀此殯人廩有仁粟復我邦族生能廉頑沒
可祭社舌敝筆剋最其大者嗚呼天心至理難假以君

豐博宜享康茂胡算不盈而止中壽霄路旣登鳳羽其
翾胡甘斂退名位不大豐其清聲嗇以厚實玄堂琢銘
我無慚色譔德考行視此樂石

候補主事趙君墓誌銘

君諱方觀字用賓號松廬姓趙氏世爲順天之武清縣人王考之篆有聲膠庠以兄左僉都御史之符之子珣爲後卽君考也康熙壬戌成進士授中書科中書舍人擢吏部累官河南提學僉事君生五歲喪其所生哀慟若成童長益穎異十五爲學官弟子越歲餼其廩米康熙壬午舉於鄉遊道日廣華問游美三就禮部不見收一避嫌不得試訖無愠容已而僉事公視河南學君侍行聞詩對易出其家法以佐提論八郡一風英淑蔚起滿歲僉事公僑寓黎陽將老焉而君亦不得志於進取

循例謁選人會僉事公疾大作與弟方頤瘁力醫藥不可請禱不可請減已算比棄養毀幾滅性服既闋大興黃公叔琳以吏部左侍郎出撫兩浙廉君賢薦於朝

召見稱 旨立命以主事權杭州北新關稅關務向領於撫臣檄一丞倖主之官攝而權輕豪胥舞智囊橐爲奸故商困而額屢缺君下車搜剔前弊杖其魁一切陋例悉報罷不數月黃公以蜚語去後事者疑君有私密相偵察吹毛索瘢不寒而栗遂請解組亟歸而難君者卒不得一閒乃自知其中讒之深也君有用世之才一試不得意旣歸不復求出推落崖岸浮湛閭里近十五

載以乾隆元年月日考終牖下年六十有六君篤于門
內之行事繼母如母事兩叔母如繼母一味之甘必獻
而後嘗補衣縮食躬自儉約解推所及累什百而不惜
也其孤脊將以某月日卜葬君于北倉先塋之次以配
卜宜人耐宜人固安名族侍御諱峻超之女博習書傳
通識大體先君二十年卒君有六子九女子惟脊存女
殤者五嫁者四皆士族觀察晃君親弟子也代脊來乞
銘銘曰

豐其文不豐其遇讒夫孔昌力枝拄卷而懷焉仁義寓
北倉之原美幽宮月夕卜夕懿壺從維千百世銘永終

封文林郎許君墓誌銘

吾讀九靈山人所撰殷德輅墓志何其與吾友樂亭許君相似也山人序德輅所折獄者八九事出其被冤者多至二十人釋其株連者多至八十人晚年憂先人墓廬圯廢謝事歸治田築室於先墓之側屬其子從大儒先生學以紹隆其先業德輅起家縣吏終縉雲縣幕而其治效乃與漢于公張釋之等豈在居顯位都尊官哉樂亭與吾偕遊黌序有聲名未三十卽棄諸生服出參人幕余嘗哂其急於謀食不知掇科第取青紫無顯揚之志旣而其子鉞舉於鄉又三十載而其孫學范復舉

京兆試余固謂讀書不食報不於身必於子孫則又疑其如于公之有陰德而莫得其端倪旣而憬然悟鼎然典曰其在斷獄乎獄有小大歐陽子云求其生而不得則生者與死者均無憾也君持此意以終身獄之有冤濫者寡矣至其小事外之株繫貧民失業或以畏死或以飢寒疾疫而瘦死此治獄者不失之踈緩卽失之迂謹也君行年七十有六經歷燕齊秦閩之區者踰四十年此四十年中所全活者或二十人或不止二十人所省釋者或八十人或不止八十人積功累行而不自知卽其子孫亦不知旁觀之人孰有載筆而爆其事者此

于公所謂陰德也許氏自再從以下四十餘棺未葬君
深以爲疚買地於橫山之陽自平涼命孫學范歸營春
秋窀穸之事依古族葬之禮無問親疎遠近悉斬板而
封之及學范成進士從弟堅曰此吾兄澤及枯骨之報
也嗚呼君於斷獄所謂生死而肉骨者不知凡幾而謂
自炫以求報哉責報於天尙可謂之陰德哉君名堯堂
字樂亭曾祖維新有鶴峰集十五卷祖機邑諸生有萍
影集十卷父戾以孫貴貤贈如其官三世皆隱而不耀
至君子孫始以科第顯弟整早卒遺孤二曰鈞曰銘教
之成立長而筮仕皆有几案之才筮宅煖契以妥闔族

之幽宮鈞銘所行視也君晚景恬愉就養子舍優游觀
化歲在庚寅六月七日考終鹽茶官署娶海寧張氏先
君十八年卒贈宜人子二鉞平涼府鹽茶同知鑑國子
監生女一適錢邑庠生趙鏞孫三學韓殤學范乾隆壬
辰進士學文尙幼曾孫二乃順乃大曾孫女三人鉞自
平涼反杭將以某年月日穿張宜人之窆而合葬焉求
如九靈山人銘其墓而不得其人也以屬余是申銘法
宜爲銘銘曰

刑鼎菌蠹宜饕殮中涵厚澤種子孫晉州虎冠盡殺人
狡援獨子畱侍親以李代僵全厥元法官向以故殺論

望天無路終戴盆有父控訴駢駢奔三刺三又宏
天恩爲理出之以不寃羈衣如焚車哼哼輿誦載路喧
平反穀梁攘善譏伯尊我詰過庭知其原例其用意他
可援胡取一一形諸言不信視我銘辭傳

封儒林郎衢州府學教授翟君墓誌銘

君姓翟氏諱之瑞字龍文號澹舍先世自汴來杭居仁
和縣臨江鄉曾祖明字前明處士祖朝英舉鄉飲賓父
士奇國子生 贈文林郎母施氏 贈孺人生三子君
其季也幼倜儻有大志讀書自塾師所授外雜覽史籍
旁及五行三式之學臨摹古人墨蹟作擘窠大書躍馬
左右射跌宕豪縱意不可一世弱冠理家政偕伯兄璘
侍堂上曲盡孝養嚴父棄養時伯仲皆先卒君獨任大
事哀毀如禮卜吉西湖之積慶山葬當沍寒說者謂築
壙土欲不越宿越宿則乾與濕強爲黏屬春氣發蟄久

仍離渙君感其說親操畚杵七晝夜趨事風雪中事蕝
買田築室以供祭事藏主祔之所君用財有程限至是
以先人窀穸之故費幾不貲前售地者以益價脅君於
訟屢讞直君猶未已或說君曰彼挾已葬之勢作無厭
之求益退讓益健并力而致於理彼且避不暇矣君曰
吾故熟思之吾先人厚德起家今當窆兆而使人獲戾
非先志也終不校訟者亦息母夫人卒哀禮一如前時
從朱子分葬說別選地龍門山松楸版築獨力任之不
以預兄子也嗚呼君之於其親也養生送死如此其盡
禮也大本立矣遠族翟欽甫君德等代絕數世皆厝淺

土爲買地作十五冢三時祭之兒子永無子娶妾有身
不相安君畜之別室子婉而復三黨中有衰替者或喪
不能殯者嫠而無倚者壯未有嗣及昏姻失時者皆量
力濟其厚薄君急人之病其天性而能極其志之所欲
施又如此乎其肫且摯也老益篤於青鳥青囊之書手
自評校寒暑不輟著有地理評論驗方集鈔若干卷遊
宴飲食之會概謝弗與有以父母葬事請者欣然從之
風雨登頓不恤也按古方製諸藥療貧者有乞雖夜必
起行之且數十年同里吳穎芳嘗論君有三反性剛毅
不可犯而或以非禮干之輒恕不與校御子孫未嘗假

以辭色而畜與臺僕從甚寬食疏衣布不爲已身妄費一錢而于致孝養周急矜無資不計其費是真能道君者君寡嗜欲善攝生迨老猶禁寒暑儼捷如少年偶示微疾遂不起屬纊時鼻筋垂寸許汗拭皆香蓋夙具靈根而不自戕賊彼教之所謂宿因吾儒之所謂全而歸也時乾隆壬午十月二十五日距君之生康熙辛未四月二十一日春秋七十有二候選州同知以次子灝進士官衢州府教授 晉封儒林郎配高氏 封安人有賢行子九人曰濤曰灝曰泮曰泰曰潮曰涵曰治曰瀚曰澍泰早殤潮澍先卒女一人適黃槐孫八人以權以

彬以根以棻以榑以標以束曾孫熙元熙敬孤濤
等以甲申十一月二十五日葬君蓮花峯陽君所自相
也來乞銘濤灝偕余交游久知君潛德中銘法乃銘曰
禮墓大夫執斧蒞葬堂斧夏屋孰治孰創收子葬翁斬
版而封霜櫟雨杵克艱厥躬猗吁仁孝施由親始孰爲
窮嫠孰爲窶子病于我乎藥死于我乎崩歸妻歸妹我
完我聘民之無祿奪公遽速不相不歌傾壚走哭蓮花
之峯閔此幽宮剖石誅德辭約義豐

余乃承墓誌銘

會城巷陌比連小屋多於大屋高塘厚垣百不得一以故焚如之旣月三四發燔灼至於數十百家而不止余翁家在隘巷火再及廬天輒反風老屋巋然在燎原煨燼之中閭里驚異以爲翁隱德所致是時翁子昂霄已登賢能之書歲在戊子某月日翁年八十考終服闋昂霄試爲令於河南攝河內林慮縣事有聲假歸將葬翁於某原以處士吳穎芳所撰狀來乞余埋幽之辭余視其狀翁之德皆庸德也而於爲汪氏計會一事在隱微幽獨之間人不及窺翁又不自表襮君子表微宜有以

觀其深也狀曰翁名坤乃承其字仁和人童年而孤上有二兄翁獨任家事赤手搢拄家漸裕人皆欲以女妻翁翁必循次第先爲二兄娶然後議及已姻二兄先後歿居喪營葬殫心力爲之仲墓不吉亟改葬仲連得三孫兄子力不能娶貲皆自翁出族人力不能葬事皆倚翁集事母夫人先意承志藝黃山松二於庭謂慈氏壽徵也貯泉以時滋灌不敢用爲茗飲融融洩洩母夫人扶進壽域九十有四乃棄養翁擗踊哀號仍嬰兒之失乳也此吾所謂庸德也世俗勉強而不能及翁根心而生若天經地義之不可分寸易古之人有行之者矣吾

不必爲翁矜也同里汪氏以禹筴著筭其出入者翁也
條目瑣細如牛毛不可爬梳翁隱之他人不能察也必
使其軒豁呈露雖錙銖無遁匿以故汪氏再世相遇無
猜心出從仕牒悉以家事委焉而其戚友之居嘉禾吳
興姑蘇者皆以稅引事相託脩脯之外無他營也余謂
不欺暗室不媿屋漏此作聖之基而中庸慎獨之學也
使充此心以臨民不虐憚獨而畏高明可以爲循吏使
充此心以事君量能後入先事後食可以爲蓋臣而皆
自一念之母自欺爲本惜乎翁之小用其道於會計也
昂霄今且臨民服翁之訓不爲循吏肯爲墨吏乎漸且

積資以至於爲公爲卿本翁之志不爲藎臣肯爲計臣乎翁之德隱藉昂霄以顯之所謂不於其身必於子孫也反風滅火天特小試其道以爲世之臨財苟得者勸若翁者豈僅僅以完保室廬酬其萬一哉昂霄例得贈而不遇 覃恩故翁仍以布衣終銘曰

洪範五福翁有其四徵以五行其光未熾火爲祝融以顯隱衷於顯於隱孰觀其通家運耳耳其社未豸厚翁於終爲有收子家不泄嗅夏屋初覆龜筮協占銘辭如
縣

贈儒林郎汪君墓誌銘

汪君扶搖旣沒之九年其孤韜英將卜葬於長興之鳳
皇山先期來乞銘按狀汪氏先出自魯成公少子六十
一傳至大四公始遷江南遂爲歙之休寧縣人祖考建
烈 誥封奉直大夫考勇錫 敕封文林郎君名純扶
搖其字也少而岐嶷秀異寒鈔暑講書若宿讀筆飛墨
騰文若宿構以是絕爲大父所憐愛在羣從中獨有銅
槃異饌之奉年十八爲諸生祭酒兼該羣業於春秋經
尤邃謂金華宋氏之論自元以上言春秋者凡五變今
則變益多而其流愈下青田之明經環谷之要訣祇以

供末學科舉之用降是而匡解明微諸編則又變諸生
爲學究爰是銳意傳疏左右采獲抉幽探微雖儒宿莫
敢抗手閔後進皮傅目瞤杜鄭王馬之書舉場發策緬
緬紛紛蒙目張口乃條食貨刑法邊防州郡數大政州
署部居補山堂之考索續源流之至論以饋貧藥儉其
窮究元本若此遭大父喪容色貶瘁嘔血數升丁所生
憂齋居墓廬三年不入內春秋諱日素服上食擗號孺
戀終身以爲常上有四兄皆能文事昕夕過從清談干
雲握衣躡履親執食器友誼謙篤感動隸人初娶于徐
未廟見以渴疾卒過時而腹悲繼娶於陳雅相禮重不

畜華妍其內行醇謹蓋天性也晚築畫溪草堂於雉城
遺編麟翰旁魄罔羅巾怡之歡徧于大江南北扁舟造
門莫適賓主揮琴刻燭造韻立成君外和而內毅侃侃
自立期爲有用之學屢試不得志雍正丁未以疾卒於
長興之里舍年僅四十有五子一人卽韜英州司馬
敕授儒林郎贈君得如其階銘曰

於維春秋微婉義悉淵源夙承助逮匡質朱墨別異微
旨廼出嗣永嘉陳不改科律莞彼荆舒新義杌飢農師
佐之歷駉蹙躒權衡有敝集解有轍牙角撐拒未究曲
直鏗鏘康侯懃懃議盈帙魯史聖文書法兩失黃澤而降

正學在歛寬以纂疏訪用師說師山考傳疑誼則闕有
儒一生汪罔來葉世歷五變鴻論秩秩爲左鍼育爲梁
起疾爲羊輪攻海涌嶽立誅諛發潛視此丹筆昊天降
訕車軸早折靈幽體翳遺著滿室我造銘辭徵以素業
授經何人鑒於哀石

湖南永順縣知縣趙君墓誌銘

趙君淺山歿旣二十年矣歲在壬辰孤輯寧將葬君於積慶山之陽而以前配葉孺人祔余據公羊之義以責其慢輯寧泣而請曰吾父之卒也吾母提挈老弱反机於杭熒熒如旅人孤昧穉無知識恐卒犯霜霧不得終春秋窀穸之事以故行營高敞十餘年不得決旣得吉壤又以五行書言三向不利遲至今庶幾唐張圓所言篤古而達於言者以爲埋幽之辭夫子幸哀而許之則吾父爲不死而前之慢可蓋也余於淺山十年以長交以弟畜距其死幾三十年噫其能已於言乎君諱賢字

端人吳山之麓有淺山所居近因以爲號本姓勞贈公
幼撫於趙遂冒其姓雍正己酉舉於鄉與余同修浙志
修潔無支離之言余被放歸田越五年淺山始成進士
榜下卽授縣令謁選得湖南之瀏陽民買田宅書契需
官印鈴尾稅多隱漏或持其事以爲居奇之地列其戶
名田數以上且啗君以厚利君慨然曰吾甫下車卽破
千人之產不祥莫大焉事且上聞條教下里民限以一
月投稅不則將按例懲儆民知有發其事者方惴恐重
足待命僅止正稅不復深求則又出望外爭先輸納匝
月而畢錮弊一清而閭閻不擾聲大起治有古風洞向

爲羣盜淵藪時清已久伏莽不興中丞命君密察之君
廉其虛并及境內諸洞久皆堵塞且力任詰奸之責適
藩伯以稅契事上聞中丞大加激賞許爲闔屬中第一
良吏會征漕力除積弊糧儲道不復入境曰是邑固無
待訪察也五年政通人和以循卓調永順竟以勞瘁死
官下歲在癸酉八月廿四日也年僅五十卒之日郡守
親視含殮告其屬曰吾爲國家惜一良吏非私同官也
喪過長沙瀏陽士民傾城奔赴哭聲殷道路君制行端
粹伯兄嘗勵之學登第後痛伯兄之不及見語輒酸楚
撫其遺女過於所生初娶於葉其父曰時青下沙場大

使繼天津孫氏其父曰居廣宛平教諭葉氏生三女長適江南已卯武科舉人許長清次適丙子科舉人王元仁次適杭州府學生王寶階輯寧則孫氏出也孫三人之藺之廉之李銘曰

君爲儒吏而非矯虔宜壽而昌不得永年令我後死銘新阡剖辭於石比石堅

道古堂文集卷四十四

仁和 杭世駿 大宗撰

墓誌銘五

方聖祥墓誌銘

君名士麟繼名來聖祥其字也爲遜志先生十一世孫
自侯城徙錢唐大父聲弘父啟元皆以孝義有聞名在
省乘君慨爽有大節母潘孺人性嚴毅有不懌輒長跪
伺色解鞠養小弱弟挽須擁樹照羹哺飯蚤莫不忍離
見長老握衣捧袂不以賤貧弛敬以急告不以亡爲解
出參人幕祥刑慎獄刊 聖諭圖解輯世法周行意主

于宣上恩德型民正俗希古循吏之治閩孽旣平以事
牽逮者皆沒入爲奴婢君捐金爲首倡悉俾贖還保聚
者數百家此一事陰德爲最大方君屬疾旣亟恍惚見
幡蓋并歛輿隸後先自知不藥哀痛呼父母誦蓼莪數
言乃瞑時康熙二十五年某月日也年三十又六娶于
倪先七年歿以某年月日合葬于靈隱山九里松之原
子二學孝學弟孫七長德發與余交銘曰
君之王父以孝旌君能行義紹令名災慄瑣尾藉保存
存吾以順沒則寧後有考信視刻銘

文學吳協南墓誌銘

士自受經卒業入學宮爲弟子曹試旅進浮湛鬻序間
不有鉅公名德弘獎其意氣增長其聲價世方希風附
影不相先後矧其埋骨旣朽嗣響不振於螢乾蠹老之
餘掇拾其煨燼乃足以感人心而流芳譽嗚呼蓋其難
也錢唐吳君嘉丙字協南年十八試於學使者補諸生
師淳安方先生黎如友同郡嚴在昌梁啟心孫灝陳兆
崙切劘於學問振華耀采爭長槃敦摩研編削之士交
目爲文中之虎始於鄉邦浸淫於十一郡漸被於大江
南北以暨京輦名流六堂觀國之彥翕然稱杭郡之文

甲天下而協南之名特晦此故曷以今相國高安公大
司農茶陵公少宰溧陽公故總憲贈宗伯沈端恪公皆
以海內鉅儒具人倫之鑒矜慎少許可獨極口之數子
之數子文譽之起蓋以此協南貧不能舉火束修鏃厲
簡交遊外聲氣坐臥容膝之室以歸金爲正鵠發爲文
章古音亮節不肯枉尺寸以求合有司故爲諸生者逾
十年曾不得分米廩之一粟兩就主考官試一俛得而
復落竟以貧故而病摧折侘傺以死死之三年友人嚴
璫斂貲葬其骸又明年醵錢刻其文以傳協南文旣出
問巷之儒心摹手追咸奉以爲圭臬有不得見見而不

盡誦習者至以儉父相目觀風督學之使若其不標舉
協南之文與夫標舉而不以實者比之提唱卽與盲椎
瞎棒無以異嗟乎協南一孱夫懦儒手不敢雌黃口不
敢臧否氣燄旣無以奪人之數子者皆有公鑒無姑息
平居討論削奪不肯纖悉假借逮協南死旣久邈循推
讓莫敢抗駕而後知其聲價意氣固不待鉅公名德之
引獎增長也嗚呼此則加於人一等矣協南尊人紫葢
先生爲名諸生好客散千金立盡爲協南娶於長洲許
氏亦故族先卒無子與協南合葬於雷院之陽銘曰
芝焚桂勵蘭先摧天豈雨露養不才欲壽其文骨早埋

於數則舛理則乖么弦孤韻鮮叶諧神鏤天剗巧絕階
恨不將子遨天街手酌青露吹紅埃夢而灑泣瓊滿懷
我今後死寫所哀銘辭磊磊無碑材揭於子集論後來

文學周汝盤墓誌銘

君諱鉞字汝盤號晚菰浙江之山陰人先世有名洪謨者官吏科左給事中劾魏閹直諫有聲四傳至君父中錫爲儒阨窮早死君方三歲聞母哭輒啼號不止旣就外傳雖弱小嶄然若成人年十八爲博士弟子員有聲黌序貧不足於養佐其從父之官毘陵未數月聞母疾卽日馳歸日夕侍湯藥衣不離於躬脇不貼於席闕於別室禱天冀以身代剗股肉以和藥卒不驗竊持厠踰出躬自浣滌至嘗糞以驗生枯嗚呼庾黔婁而後史策之闕書者幾千載矣繼此者獨君而已居憂三年不食

肉飲酒祭輒號慟絕去後至毘陵感舍旁白雀作白雀賦以寄哀苦之思今集中所傳是也君至性純篤而輔之以文學卓然可名薄遊粵東著粵南雜記他詩文數百篇居毘陵三年研精經學擬著三禮會通不果類纂左事成二十二卷前儒章沖之鄧名世不能過也晚歲始餼於米廩貢成均藉友教以自給素患失血怔忡閒發撞胸如杵曰少差猶爲諸生娓娓講說曰吾不敢食焉而怠其事也乾隆六年某月日歸自濟寧血下瀉遂劇春秋六十有五初娶於裴太學生孔光女定昏於先人彌留之際其古義可以厲世生一子大樞繼娶於婁

再娶於施生二子曰秋碧曰大柯孫四人永熾永燭永
燿永燿大樞試鴻詞不利留滯京師既聞訃難斯徒跣
歸謀葬君於柯山先人之原以裘斐兩孺人祔奉遺令
來告令曰吾一生不能爲善不能爲惡止此矣詎可傳
乎盍請於杭君志吾墓以文庶可乎余感其意乃爲銘
銘曰

君之行宜旌而耻自名君之言可道卒用是以教相誦
以傳誰曰不然

黃再岑墓誌銘

君姓黃氏名元嘉字柔則再岑其號也系於江夏勝國
時有名勝者以杉關戰功得世襲杭州右衛千戶遂爲
錢唐人四傳而爲斌以正統十四年討處州賊葉宗留
殉難得世襲指揮又七傳有名登瀛者君大父也名汝
祥者君父君少食貧不事苟得居喪擗號喉爇而色墨
行營馬鬣露宿星飯龜手以襄舂捐血滲著土上裂麻
裹創觀者蜚鼻伯兄聖修蚤世無後率長子璋純素而
奉魚菽沃酒以告靈牀曰嗚呼伯氏以是續汝爲不死
矣其孝友大節如此體瘠善病寡言笑閉關績學讀班

范以上書數萬言與鄉之詞人洪昇沈名蓀輩爲吟交
著有再岑老人集藏于家年五十又二以康熙某年月
日考終牖下先娶明孝廉越郡陶公長女生一子卽璋
繼娶同邑包公次女生三子一女子曰璉曰琛曰瑚琛
工詩善繪事奉母能色養今將以雍正某年月日葬君
某阡來乞銘銘曰

君身後有令子葬君骸鬻十指陰丸丸植楸櫟攀枝條
淚沾灑繪遺象丐銘詩貞樂石無媿辭

松谷趙君墓誌銘

君諱殿成字武韓號松谷遠祖祥三自越之尖山遷上虞十一傳至明武德將軍諱燮英始遷杭遂籍仁和君曾祖也諸生諱鶴君祖也皆以君從兄司空貴 贈光祿大夫吏部右侍郎考諱汝舟州同知以君主事銜 贈中憲大夫妣陳氏 贈恭人君德性端靜通曉經義銳意科舉之學俛得而復失會

今上卽位 詔徵孝廉方正之士士友推挽萬口一聲郡縣遂以君名上君適居母憂堅辭不應郡守秦公爝高其節弗之強也服闋需次之京師銓有日心疾作遽

歸蓋自是君無用世之志矣其修行於家施恩於嫺族
爲德於鄉鄰較著在人耳目者可更僕數也方贈公之
寢疾也醫禱罔效君刲股肉和糜以進而獲少差逮其
棄養柴毀骨立殆將滅性奉治命葬於上虞之老楮山
陳太恭人以重江越險爲嫌而主合葬非古之論越二
十年復棄養君踰時而悲右目爲之失明又以先人之
命兩不可違而檀弓出於漢儒非聖經大儒若歸震川
若呂心吾若陳幾亭皆持此議而未有定上徵諸古下
博求於麗澤之講習或曰東漢袁賀病困敕使畱葬侍
衛先公而不迎妻柩樊恭遺令棺柩一藏不宜復見如

有腐敗傷孝子之心與夫人同墳異藏此一徵也或曰
唐鄭僖有兩夫人使各自治墳見於昌黎韓氏之志墓
此又一徵也最後讀子朱子大全集知其葬父於崇安
葬母於建陽乞銘於周益公而無媿辭不以分葬爲疑
意始決行營吉壤於會保里之蔡河原蓋歷十餘年而
克竟成母志如此其難且慎也趙氏自遷杭以來皆反
葬於虞歲時上冢君必往渡曹娥過驛亭堰檢舟中多
一囊擲地鏗然有金數百知爲過客所遺停舟俟之果
有倉皇而至者詰其數驗挈還之堅詢姓氏不荅時雍
正歲在庚戌也越甲寅歲大祲爲粥以食餓者乾隆丙

辰鄉試旣鎖闈矣旅寓不戒於火者凡二百餘人君資以糗糧得復入試又資以舟楫屏履之費而後得歸辛未夏旱米價翔涌貴糴賤糶以濟閭里丙子復饑君首捐千金爲一郡紳士倡而民不病君天資儉約補衣疏食與寒畯無異赴人之急若嗜欲饑渴之不可待乳嬰掩骼醫危殯死之事習爲故常不德於色性耽著撰所編香至數萬言王右丞集致力尤深駁正舊說不下數十條辨霓裳曲七疊始有拍以駁按樂圖舊說并以糾新舊唐書之繆臨川李侍郎紱以爲不陋而典不黠且醇蓋實錄也乾隆龍集丙子七月二十七日疾卒春秋

七十有四配王氏 封恭人州同知聖如季女德門貴
族動中禮法松谷以腸澼幾殆剗臂肉入藥而愈而匿
不自言先君八年卒春秋六十有三子一人秉恕國子
監生早世女一人適國子監生汪起崙孫一人樹元國
子監典簿曾孫承熙承烈承勲曾孫女六人已卯十二
月初八日樹元奉遺命將葬君及恭人於陳太恭人之
兆來乞銘君純懿篤行君子而恭人佐之以賢孝是中
銘法乃銘曰

九九之松四尺邱濳溢遠抱青瑤流同穴者冀缺之妻
耶耐於君姑獲所求收子者牛千之孫耶荆煒煥契奠

此幽宅縣千秋

胡夙成墓誌銘

君姓胡氏名宗穎字夙成一字達齋世居仁和之橫塘
明永樂中徙巨族實京師二世祖存心公代父徙其處
者仍家仁和五世祖端敏公以豫發寧庶人逆謀歷少
保兵部尚書而族益大自君曾大父以下皆隱不仕君
昆弟五人敦睦無閒言妣王孺人暨庶母趙氏與君考
健菴公相繼厭世行營善地植枌櫨安魄兆慎終盡禮
獨任劬勩家素饒尤樂施予親串待以舉火者不可僕
數而容不矜德口不伐善性醇厚端慤平生寡過舉篤
於貧交不閒終始訓子弟以誦讀門內無勃谿之習娶

同里浦氏處士咸孚公女也賢明有法君好行其德而孺人損衣縮食以佐之鄉里稱德配焉君與孺人同生是歲爲順治己亥君以雍正癸卯考終孺人後五年沒越七年孤士鼎等卜合葬于臯亭山赤土滙之陽其地女夫章進士所贈也家婦徐介婦曰浦曰張前後奄逝皆從葬于其傍銘曰

公惟德充保合真宰巖棲谷汲韜景匿采縣解不枯和其天倪匪瑀匪琢嗛嗛而撝振乏饋貧嘉耦叶德生旣齊年死亦同穴聚脯迭摯著代義存先後不祿蘭摧芝焚婦耐于姑禮經所繹洗腆敬進不隔窻窰走乞哀言

剖茲青碑幽竈不遠左斯右斯

沈逸菴墓誌銘

吾友沈隆博學能文章爲後進魁碩歲壬子偕予入閩
道中示余所作先人行狀且句余爲文以銘按狀翁諱
建業系出吳興遷杭者凡五世矣幼穎悟讀書五行俱
下家苦貧年十四卽從父君衡公治生產喪其伯兄生
益困乃切究經世之務精晰刑法佐理事多永俄幕倚
若左右手時武進趙恭毅公方以撫臣理湖南獄檄多
往而翁與偕獄亟且語繁讞辭轆轤老吏束手不敢具
藁翁以意代爲詮次悉中窾會恭毅公覽藁驚異物色
得翁亟稱爲用世才然翁竟以是老終其身不得一酬

其用嗚呼其可悲也翁性孝友喪母田孺人時年幾艾
嗚嗚如嬰兒伯兄病篤與其仲割股肉糜藥以進仲死
事寡嫂如田孺人在時婚嫁其子女不異所生與人交
遠勢利而時緩急故歿之日家無餘財銘曰

翁受人祿以斷雀角殺人媚人如執已戮生之不得姑
緩其獄凡此祥刑退而削牘闕彼市號擅殺人子行莫
夜金求貸于死有李代僵禍可旋徙翁執不移竟抵於
理聿有巨猾地近情狎外倚奸胥屑齒吹飲希翁一諾
或可飢法袖金瑟縮憚此嶽嶽大車哼哼毳衣如璫翁
佐其化藹如春溫去哭于市來扞于門赫赫循卓內藉

翁存翁殫究圖心血耗枯藥迂禱拙旋致不虞子剖其
肱刃戰弗殊姊代爲之烹而獻諸翁已大變不可力轉
叱無怛化其言也善方翁小存吾未繼綵讀翁遺言吾
釋褊悃南山峩峩松柏擢柯伐石表隧吾銘不磨匪銘
不磨翁善孔多小子識之以慰泉阿

姚辛菴墓誌銘

君諱昌時字禹疇一字辛菴姓姚氏姚氏之先著籍吳興白河所謂關內白河姚者是也曾祖考某祖考某隱德不耀祖父行有爲校官於杭者君考玉芝隨之任家焉遂爲仁和人君五歲而孤貧不能竟學懋遷有無營甘煖以奉北堂節縮衣食而家業漸饒其葬母氏於橫山也會大雨米及窆所而暝君露處匱側或怵以蛇虎且至不爲動立泥淖中達旦人以是服君之孝兄性卞急少失意譙責不少置兄旣歿廩其遺孤子女終君世嘗賈閩中同舍客病且死以千金屬君君愕眙不卽受

客曰僕信君君乃自疑耶卒持其喪以歸而以金畀其家封識如故君勇於行義而耻爲名聲買地於鳳皇山之麓葬無後者歲若干人施櫓於宗陽宮者近三十年乾隆歲在甲子水發三天子鄣浮棺蔽江而下君與何翰林玉梁倡義收厝以待其後人而瘞其無主者山陰田多濱海舊塘埕蜚數被水君請於官率鄉人更築之延袤數十里遂成沃壤馬鞍村沙漲田畝陞科有年矣比歲大水連不收而徵稅如故大吏以君言上聞天子蠲其租勿問迹君之爲德於閭黨姻族者列筆不勝紀紀其卓卓者而君之生平可知也乾隆十五年五

月四日以末疾卒距其生之年蓋四百五十有二甲子矣初娶於張無出繼以吳有淑行有子三人勲杰珽珽嘗從學於余有孫八人均圻墀堦堂基墳坤閱二年某月日勲等卜葬君於仙芝嶺之原來乞銘銘曰

處靖自樂兮信守道之德充陶物振俗兮而不尸其功詒謀孔臧兮何子孫之不逢北山之北兮維子之幽宮剖吾銘於貞石兮將永子於無終窮

胡樂庵墓誌銘

君諱應煌字鑑澄一字樂庵姓胡氏胡氏出於南陽遷杭仁和者君曾祖善涵公也祖泓考文槐晦迹邱園培積完厚以篤生君將熾而大君秉德淳懋孝乎惟孝潔饘醢伺疴癢將以扶進壽域而嚴君卽世長號擗踊哀感行路眷戀慈闈撫循同氣雍謫之風溢于井閭從弟應瑞少孤露君收畜之分財授室迄成立謹飭畏慎通知書義以不貽先人羞實惟君教是稟余與君有通門之好少相狎優譴呶叫呼君每委曲順適余意不肯少迂推此則其他不失色不失口矣蓋寬中篤厚君子也

歲在癸丑月維季夏十有一日庀家事不少節中暵而
劇猶數念阿嬭不置口遂以卒春秋四十有九娶太原
王氏婉嫕慈順和于先後以能善事君父母戚黨間有
賢聲年四十有六先君一年卒越十有六年實維乾隆
紀元之十有三載孤佐虞始得地於烏石峯之陽卜筮
協吉以十二月十日奉君葬於其麓而以孺人王氏附
來乞銘銘曰

幽宮旣封令妻實從吹簫烏烏翠珉礫石友銘汝辭最
工維君懿德廼克終

金存齋墓誌銘

君諱肇鑾字羽階一字存齋姓金氏金于休寧爲著姓
自君祖鼎臣公始遷杭遂籍錢唐鼎臣公生三子長曰
翰襄公次則維甸公其季曰紫宸君考也余家世居如
松里與君跨街結宇對衡而望則檐霑清淙可數君同
堂兄弟凡六人余則棠棣鄂不之數適叶亡兄年齒與
君諸兄相亞余生于子維甸公仲子自白生于丑君生
于寅嬉遊追逐若舒雁行列相得尤歡方總角時自白
與君來吾家吾母爲陳糗餌以娛適其意余時雖稚昧
知具主客禮自白端靜不苟訾笑君神儀秀澈頭玉嶢

嶢里中父老皆卜爲非常兒余七歲入鄉塾君兄弟亦
能辨數與方名余東西跳踉夏楚不能收威君獨敦敦
書案以是絕爲經師邵先生所羅愛已而君事厲孝廉
樊榭工書能文章提筆就試有司不卽售而大故疊仍
伯兄早世同堂兄弟半摧謝衣食艱大摺拄不易遂決
意舍經生業握籌權出入盈縮生計藉以不絀君旣寡
兄弟自白亦孤子無依助相倚若左右手自白用出策
起家旣饒而緒益勞其官事壹以屬君君志意卓犖決
策料事巧發奇中或有齟齬伏而思一夜常數起而事
卒以集然能推誠接物不設鉤距遇人人有恩自白儉

而讓君濟之以和名節侃侃翕然爲衣冠圭臬余宦不成而宅再徙君亦去舊里自白隔巷有大宅空弗居而暱就君時共談讌曰吾不忍傷弟意也君旣無梯榮之階入貲當得行省理問不樂仕雕刻五七字以自娛每賦近游清江白石有超世之想時時就余酬和攢眉畫肚童丱時景象愴怳猶在吾胸臆間私竊自念余與君娛老而送日其在是矣而君嘗苦頭風歲在丑損其左目更一紀而舉發遂以不起方劇時自白親劑藥石鵬不貼席者幾一旬余聞驚往視不及訣嗚呼六十年游好惟自白與君而三又弱一个余獨偷視息何爲哉某

年月日將葬君于某原孤子漣淮以狀來按狀君生於康熙戊寅年十二月初二日卒於乾隆二十二年三月十七日春秋六十娶于王生觀瀾先卒繼以娣生淮籓以俞卽漣母也一女未字孫二人櫨樹銘君幽者非余莫屬銘曰

孰令君死而令余獨存泚筆磊磊兮以慰君魂君有古懷兮薄俗可敦身雖不泰兮而道則尊貞龜叶吉兮裕此後昆松門蘿戶兮清吟徹乎九京嗟幽明之理殊兮余不負乎平生之言

國子監學正邱星河墓誌銘

吾黨多魁奇英時之士而邱生星河寬中篤厚慎言語
謹步趨終身無子弟之過從余遊二十年學不泛濫而
文清樸無懦響見其進未見其止不謂其竟止於是也
生名永星河其字又字雲涇邱氏遠有代序宋高宗時
有名乾者官左正言扈蹕來杭至十世有名懋功者居
青沙鎮業紙劄鉛粉明成祖定鼎北平勾取天下都匠
實京師例當北行季弟懋才代兄往懋功植雙槐於門
江西湯毛九亂保定侯南討有司慮妨軍行將伐去懋
功子禮以先人遺澤不從執以白侯侯云樹固不必盡

伐此人亦可稱強項遽釋之鄉里稱其賢以雙槐顏其堂云又十餘傳爲永曾祖文遇祖名宗契父名峻仁和諸生貢太學例得儒官生生而穎慧三四歲授以唐律數百首琅琅成誦弱冠爲諸生文名藉甚靈根日美朋牖漸閉從余學爲無韻之文又從沈廉使菽林學爲有韻之文生平所受知者金壇于大司農拔生于童年寧化雷副憲儼生於郡庠諸城竇京兆舉生於優行長洲彭司馬賓生於賢書之數公者皆余講道論德之友所謂臭味不差池而針芥自投合也其足跡所至一遊邵武應秦使君之招再遊三山應八閩通志之聘家貧友

教四方之會稽之江南武進之江西瑞金所成就者不可僕數歲丙戌禮闈報罷

上以國子監六堂課士官乏人 命大臣選下第舉子有文望者充之於午門外命題嚴試得卷十五君名欽定第一明年補學正派率性堂日程月試壹以清真雅正爲則士風丕振 皇朝修太學志董其事者司成司業六堂學正助教等官爲分修派君爲總修擬門十有五曰綸章曰建置曰臨詣曰祀典曰禮儀曰樂律曰官師曰生徒曰選舉曰人物曰經籍曰藝文曰古蹟曰經費曰雜識先以凡例及第一門奏進

聖諭有體例都好之裏時屆鄉試君晝則趨堂課士夜則扃戶校書積勞成疾遂以不起時乾隆戊子七月二十日也年僅四十有六君天性誠摯言不忤物行不慚影律己以正不干人以私潔白之養劬貸孤寡著述甚夥有曰邱宗信譜者紀其先世勲業高行也有曰雲涇雜錄者紀前脩之嘉言懿行也其他箴銘詩賦記序之在人耳目者及雜志四卷皆其二十年來嘔出心血之作也娶劉氏事舅姑言所不及輒先意承之卒于壬申之歲先君二十年生二子曰慶筠曰中閔一女適王文河筵以某氏生三子曰中灝曰中聯曰中喬族兄振

藩爲大宗年暮無嗣中閭易名文元爲其後歲己丑十月十有一日合葬於棲真嶺之原祝予之慟非夫人而誰爲銘曰

語有云爲文傷命胡不卹死而造物競因汝子請銘君獨行